

FAAFINTA

الرسمية

OFFICIAL



RASMIGA AH

الجريدة

BULLETIN

EE JAMHUURIYADDA SOOMAALIYA

Sanadka 11aad

Muqdisho, 31 DECEMBER 2024

Lr.5

Waaxda Maamulka Faafinta Rasmiga ah
Ee Xafiiska Garyaqaanka Guud ee Dawladda

FAAFIN BIL SOO BAXA

Qiimaha waa \$XXX Dollar, lambar waliba – **RUKUNKA**: Sanaddii waa \$XXX Dollar, Soomaaliya gudaheeda – Dibaddeedana waa \$XXX Dollar. Rukunka la weydiisto waqtiga loo gooyay wuxuu ka bilaabmaa 1 Janaayo. Qiimaha Qoritaanku F.R halkii sadar iyo wixii ka yar waa \$XXX Dollar – Rukunka iyo Qoritaanku waxaa la weydiistaa Laanta Maamulka Faafinta Rasmiga ah – Lacagta waxaa lagu bixiniyaa Xafiiska Canshuuraha ee Wasaaradda Maaliyadda.

KOBNIIN**BOGGA KOOWAAD****SHARCI**

W.M

BOGGA LABAAD

XEER

BOGGA SEDDEXAAD**TALOOYIN, ISGAARSIIN, OGAYSIIS, IWM****NOVEMBER-DECEMBER****2024**



FEDERAL REPUBLIC OF SOMALIA
OFFICE OF THE PRESIDENT

SHARCI LR.33

TAARIIKH: 24-TA DISEEMBAR 2024

SHARCIGA XAKAMEYNTA KIIMIKOOYINKA BEERAHA SOOMAALIYEED

MADAXWEYNAHA J.F.S,

MARKUU ARKAY: Qodobka 87^{aad}, Faqradda 1^{aad} iyo Faqradda 2^{aad} ee Dastuurka KMG.

MARKUU ARKAY: Qodobka 82^{aad}, Faqradda 3^{aad} ee Dastuurka KMG.

MARKUU ARKAY: Qodobka 90^{aad}, Xarafka "F" ee Dastuurka KMG.

MARKUU ARKAY: Warqadda Guddoomiyaha Golaha Shacabka ee summaddeedu tahay XGGSH/657/B11/24, ku taariikheysan 23/12/2024, ujeeddaduna tahay Soo Gudbin Ansixinta "Hindisaha Sharciyeedka Xakameeynta Kiimikooyinka Beeraha Soomaaliyeed.

FR

MARKUU TIXGELIYAY: Baahida loo qabo in la meel mariyo sharcigan.

Waxa uu Madaxweynuhu soo saaray sharcigan:

Qodobka 1^{aad}

Laga billaabo marka uu Madaxweynuhu saxiixo Sharcigan, waxaa si rasmi ah loo oggolaaday Sharciga Xakameynta Kiimikooyinka Beeraha Soomaaliyeed.

Qodobka 2^{aad}

Waxa uu sharcigan dhaqan gelayaa isla marka uu Madaxwaynaha J.F.S saxiixo, waxaana lagu soo daabici doonaa Faafinta Rasmiga ee J.F.S.



Madaxweynaha J. F.S.

Mudane Dr. Xasan Sheekh Maxamuud

TUSMO

CUTUBKA 1AAD.....	1
QODOBADDA GUUD.....	1
Qodobka 1aad	1
Magaca Sharciga	1
Qodobka 2aad	1
Baaxadda Sharciga	1
Qodobka 3aad	1
Eray bixin.....	1
Qodobka 4aad	3
Ujeedadooyinka Sharcigan	3
CUTUBKA 2AAD	4
MAAMULKA IYO HOWLAHA KIIMIKOOYINKA.....	4
Qodobka 5aad	4
Maamulka Xakameynta Kiimikooyinka	4
Qodobka 6aad	5
Codsiga Diiwaangelinta Kiimikooyinka	5
Qodobka 7aad	6
Soo dejinta, Warshadaynta, Dhoofinta iyo Iibinta Kiimikooyinka Beeraha	6
CUTUBKA 3AAD:	7
BAARAYAASHA IYO KORMEERAYAASHA.....	7
Qodobka 8aad	7
Magacaabista Baarayaasha iyo Falanqeyayaasha	7
Qodobka 9aad	7
Awoodaha Baaraha.....	7
Qodobka 10aad.....	8
Qaadashada Aqoonsiga shaqaalaha.....	8
Qodobka 11aad	9
Baarista (inspection) iyo soo Qaadista Muunadaha	9
Qodobka 12aad.....	10
Falanqaynta Muunadaha ku Saleysan Codsii	10



Qodobka 13aad.....	10
Shahaadooyinka falanqaynta (Analyst)	10
Qodobka 14aad.....	10
Ilaalinta Deegaanka.....	10
CUTUBKA 4AAD	11
DAMBIYADA IYO CIQAABAHA.....	11
Qodobka 15aad.....	11
Dambiyada ka dhalan kara Sharcigan.....	11
Qodobka 16aad.....	12
Ciqaabaha Dambiyada ku xusan Sharcigan	12
Qodobka 17aad.....	12
Caddeymo	12
Qodobka 18aad.....	12
Mas'uuliyadda Dambiga ee Maareeyayaasha ,Wakiillada iyo Shaqaalaha	12
Qodobka 19aad.....	13
Amarro Dhameystira Xukunka	13
CUTUBKA 5AAD	13
QODOBO KALE OO ISKU DHAFAN.....	13
Qodobka 20aad	13
Dhiirigelinta wax soo sarka Gudaha	13
Qodobka 21aad.....	13
Xeer Nidaamiyayaal	13
Qodobka 22aad	13
Dib-u-eegis	13
Qodobka 23aad	14
Baabi'in.....	14
Qodobka 24aad	14
Dhaqan-galka Sharciga	14



CUTUBKA 1AAD QODOBADDA GUUD

Qodobka 1aad Magaca Sharciga

Sharcigan waxaa lagu Magacaabaa Sharciga Xakameynta Kiimikooyinka Beeraha Soomaaliyeed.

Qodobka 2aad Baaxadda Sharciga

Si waafaqsan Qodobada 25, 27, 45,52 iyo 126 ee Dastuurka kumeel-gaarka ee Jamhuuriyadda Federaalka Soomaaliya Sharcigan waxaa looga dhaqmi doonaa Jamhuuriyadda Federaalka Soomaaliya.

Qodobka 3aad Eray bixin

Ayada oo la eegayo ujeedada sharcigan, haddii aan si kale loo dhigin, ereyada soo socda waxaa loo qaadanayaa mid walba qeexidda ku hor qoran:

1. **“Kiimikooyinka Beeraha”** Waxaa loola jeedaa bacramiyeyaasha, Xakameeyeyaasha kobaca, fermoonis (**Pheromones**), iyo kiimikooyinka badbaadinta dhirta ay ka mid yihiin, fangi- dileyaasha, Dullin-dilayaasha, nema-dilayaasha (**Nematicides**), geed-hoosaad-dilayaasha, caaro- dilayaasha, bakteeriya-dilayaasha, jiir-dilayaasha, dixri-dilayaasha, shimbir-dilayaasha, Dullin-dilayaasha, kiimikooyinka noolaha saameyn ku lahayn, nooleyaha bacramiye ama kiimiko kasta oo kale oo loo isticmaalo kor u qaadista, ilaalinta caafimaadka dhirta iyo wax soo saarka dhirta iyo waxyaabaha ka dhasha;
2. **“Beeraha”** waa loola jeeda dhul cayiman oo loo asteeyay ama loogu tala-galay ku dhaqanka ku saabsan tacabashada dalagyada si loogu adeegsado quud ama ganacsi;
3. **“Baare”** waxaa loola jeeda qof lagu magacaabey si waafaqsan sharcigan si uu u noqdo baare ujeedooyinka sharcigan;
4. **“Falanqeeye-Analyst ”** waxaa loola jeeda qof lagu magacaabey si waafaqsan sharcigan si uu u noqdo falanqeeye ujeedooyinka sharcigan;



5. **“Dhoofiye”** waa qof lagu diiwaan geliyey sharcigan si uu u dhoofiyo Kiimikooyinka Beerahaama maadooyinkooda;
6. **“Bacrimiye”** waa walxo kasta ama isku-qas sheeyaal loogu talo-galay ama loo bixiyey hagaajinta ama joogteynta koritaanka dhirta ama wax-soo-saarka, waxaana ku jira digada, qashinka, dambaska, Jeesso ama wasakhda marka lagu iibiyo xaaladeeda asal iyo magac iskumid, aan ka ahayn nuurad.
7. **“Sun bixiye”** waa waxii Kiimiko Beereed ah ee ku muujinaya sunnimo weji uumi;
8. **“Soo dejiye”** waa qof lagu diiwaan geliyey sharcigan inuu soo dejiyo Kiimikooyinka Beeraha ama Maadooyinkooda.
9. **“Summad”** waa wax kasta oo la qoray, la daabacay ama qaab garaaf ama ku dhegan waxii Kiimiko Beereed ama weelka lagu keenay Kiimikooyinka Beeraha iyo weelka dibadda ama xirmooyin tafaariiq ee Kiimikooyinka Beeraha;
10. **“Soo saare”** Waa qof lagu diiwaan geliyey sharcigan si uu u soosaaro Kiimikooyinka Beeraha ama maadooyinka loo isticmaalo Kiimikooyinka Beeraha;
11. **“Wasiir”** waa Wasiirka beeraha iyo waraabka xukuumadda Federaalka Soomaaliya;
12. **“Wasaarad”** Waxaa loola jeedaa Wasiirka Wasaaradda Beeraha iyo Waraabka ee JFS;
13. **“Dulin”** Waxa loola jeedaa noole kasta (dhir,xayawaan,cayayaan,jeermis,IWM) ee jooga goob iyo waqti aan loo baahneyn waxyeelana u geysan kara si toosa ama dadban dhir,dalag,xoolo iyo dad.
14. **“Adeegsade dulindile”** waa qof haysta shuruudaha adeegsiga sunta dulindilaha sidaasna uga diiwaan gashan sharcigan;
15. **“Dulindile”** waa kiimiko, oo qaabka astaamaheeda summadeed loogu adeegsado in dulinka looga laayo dalagga beeraha;
16. **“Dhismayaasha”** waa dhismooyin sida lagu qeexay xeerarka lagu sameeyey sharcigan;
17. **“Qalabka Ilaalinta Shakhsiyeed”** waa dhammaan dharka loo baahanyahay inuu ilaaliyo adeegsadaha ama qofka ka shaqeeya Kiimikooyinka Beeraha sida lagu cadeeyey sharcigan;
18. **“Ganacsade Diiwaan gashan”** waa qof Ganacsade ah oo sharcigan uga diiwaan gashan inuu iibiyo Kiimikooyinka Beeraha;



19. **“Khabiiir sunta uumiga oo diiwaan gashan”** waa qof haysta qoraal inuu u qalmo ka shaqeynta sunta uumiga bixisa una diiwaan gashan sida ku shaqeeye suntaas ama ka hawlgale sharcigan;
20. **“Kiimiko Beereed la Xadiday”** waxa loola jeedaa kiimiko beereed u keeni karta halis Caafimaad Bulshada, Beeralayda, Xoolaha, Duurjoogta, Shinnida, Deegaanka iyo dalagyada.
21. **“Badqab”** waxaa loola jeedaa badqabka aadanaha, xoolaha, duurjoogta, shimbiraha, kalluunka iyo noolayaasha kale iyo dhul, biyo, hawo iyo deegaan guud;
22. **“SARIS”** Waa Hay’adda Sharciiyeynta Adeegyada & Baaritaanka Beeraha Soomaaliyeed “Somali Agricultural Regulatory and Inspection Services (SARIS)”.
23. **“Iibin”** waxaa loola jeedaa bixinta, xayeysiinta, xafididda, shaacinta, gudbinta, gaarsiinta, geynta ama kala-beddelashada.

Qodobka 4aad Ujeedadooyinka Sharcigan

Ujeedooyinka sharcigaa waa:

1. In la xakameeyo soo dejinta, dhoofinta, iibka, wax soo saarka, Badqabka iyo sidoo kale ilaalinta caafimaadka bulshada, dhowrida iyo xanaaneynta deegaan marka laga hadlayo Kiimikooyinka Beeraha.
2. In la helo ama la abuuro suuq iyo jawi xor ah ayna u siman yihiin dhamman kuwa soo dejiya, soo saara iyo kuwa qaybiya kiimikooyinka beeraha.
3. In la xaqiijiyo saameynta ama wixii xakameynta kiimikooyinka beeraha ay u/ku leeyihiin dulinnadda iyo dalagyada loogu talagaley.
4. In la xakameeyo in kiimikooyinka beeraha ay ku galaan gacan qaldan.



CUTUBKA 2AAD
MAAMULKA IYO HOWLAHA KIIMIKOORYINKA
Qodobka 5aad
Maamulka Xakameynta Kiimikooryinka

1. Hay'adda SARIS ayaa leh masuuliyadda inay kormeerto, maamusho ama hirgeliso ku dhaqanka sharcigan.
Hawlaha Xakameynta Kiimikooryinka waxa ka mid ah:
 - b. Baaritaanka iyo la socodka arrimaha la xiriira Warshadda Kiimikooryinka Beeraha oo ay tahay inay SARIS kormeerto.
 - t. Hubinta in kiimikooryinka Beeraha sida ugu habboon loo diiwaan geliyey iyo in Kiimikooryinka Beeraha noocaas ah loo adeegsado hab raacsan sumaddooda ku saleysantahay xeerarka lagu sameeyey qodobkan.
 - j. Dejinta habka lagu kormeero tayada, soo gelinta iyo qaybinta Kiimikooryinka Beeraha Soomaaliya.
 - x. Tixgelinta codsiyada diiwaan gelinta ee soo-saareyaasha Kiimikooryinka Beeraha, codsabayaasha ganacsi shatiyeysan ee Kiimikooryinka Beeraha iyo khabarada sunta uumiga ee diiwaan gashan iyo bixinta shatiyada
 - kh. Hakinta, burinta, ka-laabashada shahaado diiwaan gelin, shati lagu bixiyey sharcigan ama Xeer nidaamidaamiyayaasha hay'adda.
 - d. Kala talinta Wasiirka arrimaha ku saabsan siyaasadaha kiimikooryinka beeraha.
 - r. Kala shaqaynta hay'adaha kale dhaqan gelinta sharcigan; iyo.
 - s. Habeynta Warshadda kiimikooryinka Beeraha ee Soomaaliya ay ka mid tahay soo saarka, baakadeynta, soo dejinta iyo suuqgeynta kiimikooryinka beeraha.
 - sh. Habeynta soo dejinta alaabta aan la warshadayn ee loo isticmaalo samaynta kiimikooryinka beeraha.
- dh. Sare u qaadida soo-saaridda kiimikooryinka beeraha.
- c. Kala talinta dowladda Federaalka iyo dowlad Goboleedyada dalka
 - i. Soo iibsiga, soo dejinta iyo qaybinta hufan ee waqtiga ku habboon ee kiimikooryinka Beeraha.
 - ii. Samaynta xarumo bixinta tafaariiqda kiimikooryinka Beeraha ee



degmooyinka.

- iii. Dejinta siyaasadaha la xiriira soo-saaridda iyo qeybinta kiimikooyinka Beeraha.
- g. Kormeeridda iyo tijaabinta kiimikooyinka Beeraha si loo hubiyo tayada iyo badqabka.
- f. Bixinta shatiyada soo-saarayaasha, qaybiyayaasha iyo kuwa iibiya tafaariiqda kiimikooyinka Beeraha.
- q. Kor u qaadida, iyadoo lala kaashanayo daneeyayaasha warshadaha beeraha, cilmi baarista ku saabsan kiimikooyinka Beeraha.
- k. Xaqiijinta in kiimikooyinka Beeraha ee la soo dhoofiyey ama la soo saaray ama lagu qaybiyey in ay waafaqaan heerarka tayada iyo Badqabka sida sharcigan uu farayo; iyo.
- l. Daraasayn iyo u-kurgelida arrimaha la xiriira warshadaha kiimikooyinka Beeraha oo ay Wasaaraddu ka codsato SARIS inay la socoto, oo ay waqti ka waqti u soo gudbiso arrimahaas oo ay ku taliso tallaabooyinka ay u aragto inay lama huraan yihiin ama laga talo bixin karo danaha dadweynaha ee maareynta iyo horumarinta warshadahaas.

Qodobka 6aad

Codsiga Diiwaangelinta Kiimikooyinka

1. Codsiga diiwaan-gelinta ee Kiimikooyinka Beeraha waxaa loo dirayaa Hay'adda SARIS si waafaqsan qodobka iyadoo la isticmaalayo foom cayiman oo ay la socon doonaan waxyaabaha soo socda:
 - b. Khidmad horay loo qoray; iyo
 - t. Xogta, Muunado iyo Aalad kasta oo ay u baahan karto SARIS
2. Marka ay hesho codsi isdiiwaan-gelin, SARIS waxay baari doontaa codsiga si ay u go'aamiso in Kiimikada beeraha ee la codsanayo ay tahay mid wax ku ool ah oo ku habboon in lagu isticmaalo Soomaaliya ama ay waafaqsan tahay xeer nidaamiyayaasha.
3. SARIS waxa ay sameyn kartaa, kadib markii ay baarto codsiga:
 - b. Inay ogolaato diiwaangelinta Kiimikooyinka Beeraha;
 - t. Inay diido diiwaan-gelinta Kiimikooyinka Beeraha;
 - j. Inay dib u dhigto go'aan ka gaarista haddii loo baahdo macluumaad dheeri



ah; ama

- x. Haddii Kiimikada Beeraha ay ka diiwaan gashant ahay waddan kale, ay diiwaan geliso Kiimikooyinka Beeraha iyada oo la marinayo tijaabooyin dheeri ah, ha noqoto gudaha Soomaaliya ama sheybaar shisheeye oo la aqoonsan yahay, si loo hubiyo wax ku oolnimadeeda iyo ku habboonaanta Soomaaliya.
- 4. Haddii ay SARIS diiwaan-geliso Kiimikooyinka Beeraha, waxay siinaysaa codsada:
- b. Shahaado iyada oo markaasina ku dhejineysa, shahaadada la siiyay shuruudaha la xiriira soo dejinta, dhoofinta, warshadaynta, astaynta, xayeysiinta, qaybinta, iibka iyo adeegsiga Kiimikooyinka Beeraha si loo hubiyo wax ku oolnimada iyo ku habboonaanta Soomaaliya.
- t. Kala saarida Kiimikooyinka Beeraha iyagoo ah Kiimikooyinka xadaysan ee Beeraha si loogu maareeyo daryeel gaar ah una keenin wasakheynta deegaanka, ama waxyeello ugu geysan aadanaha, xayawaanka ama nolosha dhirta; ama
- j. In adeegsiga Kiimikooyinka Beeraha ay u baahantahay in lagu adeegsado iyada oo uu jiro kormeerka qof ay u xilsaartey SARIS.

Qodobka 7aad

Soo dejinta, Warshadaynta, Dhoofinta iyo Iibinta Kiimikooyinka Beeraha

1. Qofna ma dhoofin karo, sooma gelin karo, ma iibin karo, kumana warshadayn karo Gudaha Soomaaliya walxaha Kiimikooyinka Beeraha kuwaas oo aan lagu diiwan gelinin, baakadaynin si waafaqsan xeer nidaamiyayaasha lagu sameynayo sharcigan.
2. Qofna Soomaaliya dibadda ugama dhoofin karo ama dib uguma soo-dhoofin karo Kiimikooyinka Beeraha ilaa uu qofka ama kiimikooyinka beeraha ay buuxiyaan shuruudaha lagu tilmaamay Sharcigan.
3. Qofna kuma iibin karo Soomaaliya dhexdeeda kiimikooyinka Beeraha ilaa uu qofku yahay/tahay iibiye leh shati ku diiwaangashan si waafaqsan sharcigan.



CUTUBKA 3AAD
BAARAYAASHA IYO KORMEERAYAASHA

Qodobka 8aad
Magacaabista Baarayaasha iyo Falanqeeyayaasha

1. Maareeyaha hay'adda SARIS, ayaa magacaabaya Falanqeeyayaasha iyo baarayaasha ku haboon oo u qalma fulinta ujeedada sharcigan; iyada oo shuruudu tahay in ruqsadda la gala noqon karo haddii ay ku kacaan kiisas anshax xumo iyo wax kasta oo sharciga ka hor imanaya.
2. Qofka lagu magacaabay si waafaqsan faqrada (1aad), kuma lug yeelan karo wax hawl ah oo la xiriirta soo dejinta, dhoofinta, soo-saaridda, ka-shaqaynta, iibinta ama qaybinta Kiimikooyinka Beeraha.

Qodobka 9aad
Awoodaha Baaraha

1. Baaraha oo ujeedkiisu yahay fulinta howlihiisa/howlaheeda sida ku xusan sharcigan awoodihiisu waa;
 - b. Inuu galo ama baari karo meel kasta, dhismooyin, gaari ama doon, ujeedkeedu yahay in uu fuliyo howl kasta oo lagu tilmaamay sharcigan iyo xeer nidaamiyayaasha lagu sameeyey sharcigan iyadoo uu raacayo tilmaamaha hoos ku xusan.
 - i. In baaruhu aaminsan yahay in Kiimikooyinka Beeraha oo uu sharcigan khuseeyo lagu keydiyey, iibiyey ama loo adeegsaday;
 - ii. In baaruhu uu aaminsan yahay in ay jiraan walax, qof, xayawaan, ama dalag oo ay waxyeelleysay Kiimikooyinka beeraha.
 - iii. In goobta loo adeegsan karo Warshadaynta kiimikooyinka Beeraha.
 - iv. In baaruhu si maangal ah uga shakisan yahay in loo adeegsan karo ama laga yaabo in loo adeegsado fulinta fal-dambiyeed sida uu dhigayo dharcigan ama Xeer nidaamiye kasta oo lagu sameeyo sharcigan.
 - t. Inuu baaro walax kasta ee kiimikooyin Beeraha ee laga helo meel kasta sida sida; Dhismooyin, Gaari, Markab ama furidda weelka laga helo Dhismooyinka ee la rumeysanyahay inay ku jirto Kiimikooyinka beeraha kana qaado Muunado.
 - j. Baaruhu inuu waydiiyo qofka soo saaridda dukumentiyada, buugaagta



iyo wax kasta oo la xiriira kiimikooyinka beeraha si uu u baaro ama nuqul uga qaato.

2. Mulkiilaha ama qof kasta oo Mas'uul ka ah goob kasta, dhismooyinka lagu xusay faqrada (1aad) ee qodobkan iyo qof kasta oo laga helo dhismaha ama goobta waa inuu siiyaa baaraha dhammaan cawimaadda maangalka ah ee u suurtagalinaya baarayaasha inay fuliyaan waajibaadkooda shaqo sida ku xusan sharcigan ama xeer nidaamiyayaasha uu sameynayo sharcigani.
3. Qof walba oo u diida gelitaanka baaraha ku shaqeynaya qodobkan ama ka horjoogsada baaritaanka ama isagoo si cudurdaar la'aan ah ugu guul darreysta inuu soo saaro Kiimikooyinka Beeraha, qalab ama dukumanti si loo baaro, wuxuu galayaa dembi.
4. Qofna xaq uma leh in la siiyo lacag ama magdhaw qaddarka kiimikooyinka beeraha ee muunad ahaan loo qaaday sida ku xusan qodobkan.

Qodobka 10aad

Qaadashada Aqoonsiga Shaqaalaha

1. Baaraha waxaa la siinayaa aqoonsi leh sawirka iyo darajada baaraha iyo sumadda SARIS marka loo magacaabo baare si uu howshiisa uga guto islamarkaana sitaa marka uu galayo goobaha, Dhismooyinka, Gaari ama markab sida ku xusan faqrada 1aad ee qodobka 9aad ee sharcigan.
2. Kaarka ama Aqoonsiga waxaa in la tusaa dadka ay qusayso marka Baarayaashu ay adeegsanayaan awoodooda iyadoo la raacayo tilmaamaha faqradda 1aad ee qodobkan 10aad, ama markii uu ka codsado qofka ay khusayso.
3. Qofka la macaamilaya baaraha waa inuu weydiiyaa baaraha inuu tuso aqoonsigiisa oo ay ku caddaahay macagiisa iyo darajadiisa.
4. Mulkiilaha ama qofkasta oo mas'uulka ka ah goob kasta, Dhismooyin lagu xusay faqrada (1aad) ee qodobkan iyo qof kasta oo laga helo dhismaha ama goobta waa inuu siiyaa baaraha dhammaan caawimaadda maangalka ah ee u suurtagelinaya Baarayaasha inay ku fuliyaan waajibaadkooda shaqo sida ku xusan Sharciga ama xeer nidaadmiye kasta oo kale ee lagu sameeyo sharcigan.



Qodobka 11aad
Baarista (inspection) iyo soo Qaadista Muunadaha

1. Baaraha wuxuu waqti kasta oo macquul ah iyo xilliga wax-soo-saarka, haddii uu u baahdo—
 - b. Galayaa oo baarayaa dhismaha walba, goob ama gaari oo uu u hayo sabab macquul ah oo uu ku aamino inay kujiraan wax Kiimiko Beeraha ama diiwaanno la xiriira soo dejinta, warshadayn ama iibka Kiimikooyinka Beeraha.
 - t. Haddii baaruhu u arko inay lagama maarmaan tahay la wareegi karaa ama dibadda u soo saari karaa wixii Kiimikooyinka Beeraha ah ama buugaagta, diiwaanno ama dukumiintiyo ee kujira Dhismooyinkaas, goobtaas ama gaarigaas kuwaasi oo ku saabsan soo saarista, soo dejinta, isku-qaska, isku-lifaaqa ama iibinta Kiimikooyinka Beeraha oo uu uhayo sabab macquul ah uu ku aamino inay keeneyso caddayn ku saabsan wax kasta oo ka hor imanaya mid ka mid ah shuruudaha sharcigan ama xeer nidaamiye kasta oo lagu sameeyay sharcigan;
 - j. Qaadaa muunadaha noocaas ah sida loogu talagalay wax kasta oo Kiimikooyin Beeraha ah maadaama uu u arki karo in lagama maarmaan u tahay gaarista ujeedka tijaabo ama baaritaan una yeeran karaan qofka kujira dhismaha ay kujirto Kiimikooyinka Beeraha, si uu u siiyo caawimaad macquul ah u baahan karo fulinta hawsha.
2. Baaruhu wuxuu qaadayaa tillaabooyinka sida ugu macquulsan loogu dhaqmi karo inuu ogolaado in milkiilaha ama qofka ku jira dhismaha Kiimikooyinka Beeraha fursad ay goobjoog ku ahaadaan marka wax baaritaan ah laga sameeynayo dhismayaasha.
3. Haddii la rabo in muunad loo gudbiyo baaritaan (analysis), baaraha gudbinaya muunadda waa inuu kahor ama sida ugu dhaqsaha badan kadib markii uu soo gudbiyo ogeysiyo milkiilaha Kiimikooyinka Beeraha, inuu doonayo inuu muunadda baaritaan urabo.
4. Haddii uu baaruhu soo qaado muunada si loo falanqeeyo wuxuu u kala qaybin doonaa Saddex (3) qaybood wuxuuna sameynayaa in qayb kasta la calaamadeeyo, la shaanbadeeyo ama la xiro, wuxuuna u dirayaa labo (2) qayb oo ka mid ah muunadda falanqayn uuna weheliyo qoraal saxiixan oo ah in muunadda loo qaaday qaabkii loogu tala galay, qaybta saddexaadna waa inuu



u geeyo milkiilaha ama iibiyaha.

5. Marka uu u qaadayo muunadda si loo soo falanqeeyo sida ku xusan qodobkan, baaruhu wuxuu raacayaa habraaca loo dejiyey.
6. Qofna xaq uma yeelan doono in lacag lasiiyo ama uu magdhow u dalbado qaddarka Kiimikooyinka Beeraha ee muunada ahaan loo qaatay sida ku xusan qaybtaan sharciga.

Qodobka 12aad

Falanqaynta Muunadaha ku Saleysan Cods

1. Mar kasta oo iibsadaha kiimikooyinka beeraha uu qoraal kaga codsado hay'adda islamarkaana iibsaduhu uu bixiyo kharashka muunadda oo ay wehliso khidmadda soo qaadidda muunadda sida uu qabo sharcigan,
2. Baare ka socda hay'adda ayaa soo iibinaya muunadda Kiimikada Beeraha una gudbinaya falanqeeyaha (analyst) ka dibna wuxuu u gudbinayaa iibsadaha shahaadada falanqaynta.

Qodobka 13aad

Shahaadooyinka falanqaynta (Analyst)

1. Shahaado kasta oo uu sameeyey falanqeeye si waafaqsan sharcigan waxa ay noqoneysaa mid kama dambays ah.
2. Haddii uu jiro hab loo dejiyey falanqeynta walxaha kiimikada Beeraha, falanqeeyuhu waa inuu caddeyaa inuu raacay habkii loo dejiyey.

Qodobka 14aad

Ilaalinta Deegaanka

1. Qof kasta oo adeegsanaya Kiimikooyinka Beeraha waxaa waajib ku ah:
 - b. Yareeynta burburka deegaanka;
 - t. Inuusan qubin Kiimikooyinka Beeraha;




- j. Ka-hortagga wasakheynta iyo ku qubidda dhulka, hawada iyo biyaha;
- x. Ka hortagga in kiimikooyinka Beeraha ay galaan deegaanka iyaga oo marayo qulqulka biyaha.
- kh. Inuu u nadiifiyo kiiimikooyinka beeraha si deg deg ah ayadoo la adeegsanayo habraacyo loogu tala-galay;

CUTUBKA 4AAD DAMBIYADA IYO CIQAABAHA

Qodobka 15aad Dambiyada ka dhalan kara Sharcigan

1. Qof kasta waxa uu noqon karaa dambiile haddii uu:
 - b. Si ula kac ah u sameeyo qoraal been ah, oraah ku jirta warbixin, diiwaan, dukuminti lagu tilmaamay sharcigan, ama amar ay soo saartay Hay'adda SARIS, iyada oo la raacayo sharcigan iyo shuruucda kale ee dalka.
 - t. Si ula kac ah u beeniya ama u baabi'iya warbixin ama dukumintiyo kale ee lagu tilmaamay xeer nidaamiyayaal ay soo saartey Hay'adda SARIS.
 - j. Si ficil ah ugu xadgudba qodobada sharcigan, khatar geliya nolosha iyo jiritaanka qof ahaaneed ama khatar geliya hanti ama deegaanka.
2. Qof kasta oo xannibaad ku sameeya baare (inspector) ama falanqeeye (Analyst) wuxu gelaya dambi haddii:
 - b. Cudurdaar la'aan uu carqaladeeyo, dhibaateeyo ama ka horjoogsado baare ama falanqeeye isaga oo kujira fulinta awoodahiisa sida ku xusan Sharcigaan;
 - t. Si ula-kac ah ama taxaddar la'aan ah u sameeya bayaan ama soo-saaro dukumiinti been ah kaasoo marin-habaabin ku ah baaraha ama falanqeeyaha ku hawlan gudashada waajibaadkiisa si waafaqsan Sharcigan.
3. Dembiyada ay gasho shirkad.
 - b. Haddii dambi ay gashay shirkad leh shakhsiyad qaanuuneed la caddeeyo in lagu galay ogolaanshaha ama qarinta, ama loo aanayn karo diidmo ka timid Agaasime, Maareeye, Xoghaye ama Sarkaal kale oo ka tirsan Shirkadda ama qof kasta oo ku shaqeynayay jagadaas, shirkadda ayaa gashey dembigaas waxana lagu oogayaa dacwad ciqaabeed si waafaqsan sharcigan.



4. Dambiyada la xiriira wasakhaynta deegaanka:
5. Qof kasta oo deegaanka ku wasakheeya kiimikooyinka beeraha wuxuu galayaa fal-dambiyeed.

Qodobka 16aad

Ciqaabaha Dambiyada ku xusan Sharcigan

Dambi kasta ee ka dhasha jabinta sharcigan waxaa lagu dhaqayaa Xeerka Ciqaabta Soomaaliyeed iyo Xeerarka kale ee dalka.

Qodobka 17aad

Caddeymo

1. Dacwad kasta oo lagu qeexey Sharcigan waxaa caddeyn u noqonaya:
 - b. Muunad Kiimikooyin Beereed oo uu soo qaaday baare, kana kooban walxo isku mid ah isla markaana lehna sifo iyo tayo isku mid ah, marka loo eego walxihii laga soo dhex qaaday;
 - t. Shahaado falanqeyn oo uu saxiixay falanqeeye.

Qodobka 18aad

Mas'uuliyadda Dambiga ee Maareeyayaasha, Wakiillada iyo Shaqaalaha

1. Mar kasta oo Maamule, Wakiil ama Shaqaale soo-saare, soo-dejiye ama ganacsade diiwaan gashan ee Kiimikooyinka Beeraha uu sameeyo ama uu ka tago sameynta ficil kasta oo dhib keena wuxuu ku noqonaya dambi soo saaraha, soo-dejiyaha ama milkiilaha wuxuuna ku muteysanayaa ciqaab sida xusan sharcigan ama shuruucda kale ee dalka.
2. Markasta oo soo-saare, soo-dejiye, mulkiile, ama ganacsade diiwaan gashan ee Kiimikooyinka Beeraha uu sameeyo ama uu ka baaqsado hawl weliba oo noqon karta dembi wuxuu ku muteysanayaa ciqaab sida ku xusan sharcigaan ama shuruucda kale ee dalka.



Qodobka 19aad
Amarro Dhameystira Xukunka

1. Maxkamaddu marka ay xukumeysa qof kasta oo dembi ku galey sharcigan ama xeer nidaamiyayaasha hoos yimaada, waxay qaadaysaa tallaabo kasta oo ay u aragto inuu ku haboon yahay, sida:
 - b. La wareegidda ama tuuridda/ka takhalusidda Kiimikooyinka Beeraha;
 - t. Bixinta qayb ka mid ama dhammaan kharashaadka iyo lacagaha kale ee ku baxa falanqeynta (Analysis) Kiimikooyinka Beeraha;
 - j. la wareegid hanti(lacag, dukumiintiyo, xafiisyo ama dhisme, baabuur, farshaxan, doonyo ama qalab) loo adeegsaday fulinta dembiga;

CUTUBKA 5AAD
QODOBO KALE OO ISKU DHAFAN

Qodobka 20aad
Dhiirigelinta wax soo sarka Gudaha

Wasiirka Maaaliyadda asagoo ka duulaya talo soo jeedinta Hay'adda SARIS wuxuu hirgelinayaa siyaasadaha cashuureed ee ku saabsan Kiimikooyinka beeraha ee laso dejiyo si loo dhiiragliyo warshadaha gudaha.

Qodobka 21aad
Xeer Nidaamiyayaal

SARIS iyadoo la tashaneysa Wasaaradda, waxay soo saaraysaa xeer-nidaamiyayaasha kiimikooyinka beeraha si waafaqsan sharcigan.

Qodobka 22aad
Dib-u-eegis

Sharcigaan waxaa dib-u-eegis lagu sameyn karaa xilli kasta oo baahi lagama maarmaan ah ay timaado kadib markuu dhaqan-galo;



Qodobka 23aad

Baabi'in

Sharcigaan waxa uu baabi'inayaa laga billaabo marka uu dhaqan-galo Sharci lambar. 49 ee 17 July 1971 kuna saabsan sunta cayayaanka ama xeer kasta oo kale oo kahor imaanaya ama aan la socon karin sharcigan.

Qodobka 24aad

Dhaqan-galka Sharciga

Sharcigaan waxa uu dhaqan-gelayaa marka uu ansixiyo Baarlamaanka Jamhuuriyadda Federaalka Soomaaliya, uuna Saxiixo Madaxweynaha JFS, laguna soo saaro Faafinta Rasmiga ah ee Dawladda FS.





**ANSIXINTA HINDISE-SHARCIYEEDKA XAKAMEYNTA
KIIMIKOOYINKA BEERAHA SOOMAALIYEED**

Senatarrada Codeeyay	Oggolaaday	Diiday	Ka Aamusay
29	29	0	0

**Guddoomiyaha Golaha Aqalka Sare
ee Baarlamaanka Federaalka Soomaaliya**

Sen. Cabdi Xaashi Cabdullaahi

Taariikh: 19 Nofeembar, 2024

**Guddoomiye Ku-xigeenka Koowaad ee Golaha Aqalka Sare
ee Baarlamaanka Federaalka Soomaaliya**

Sen. Cali Shacbaan Ibraahim


Taariikh: 19 Nofeembar, 2024

**Guddoomiye Ku-xigeenka Labaad ee Golaha Aqalka Sare
ee Baarlamaanka Federaalka Soomaaliya**

Sen. Cabdullaahi Cali Xirsi

Taariikh: 19 Nofeembar, 2024

JAMHUURIYADDA FEDERAALKA SOOMAALIYA



**GOLAHA AQALKA SARE
BAARLAMAANKA FEDERAALKA SOOMAALIYA**

**QARAAR GOLE
ANSIXINTA HINDISE-SHARCIYEEDKA
XAKAMEYNTA KIIMIKOOYINKA BEERAHA
SOMAALIYEED”**

Muqdisho,
19^{ka} Nofeembar, 2024

7/2/24

Tix: GAS/B-11/KF5/23/24

Tr: 19 Nofeembar, 2024

Kalfadhiga 5^{aad}

Kulankiisa 20^{aad}

GOLAHA AQALKA SARE EE BAARLAMAANKA FEDERAALKA SOOMAALIYA

MARKUU AKHRIYAY:

Hindise-sharciyeedka “**Xakameynta Kiimikooyinka Beeraha Soomaaliyeed**” oo ay nuqulkiisii koowaad soo curisay Xukuumadda Federaalka Soomaaliya uuna soo ansixiyay Golaha Shacabka ee Baarlamaanka Federaalka Soomaaliya, soona gaaray Golaha Aqalka Sare **09 Oktoobar, 2024**, si uu uga guto waajibka dastuuriga ah ee loo igmaday.

MARKUU ARKAY:

Qod.82^{aad} iyo **Qod.83^{aad}** ee Dastuurka KMG ah iyo **Qod.50^{aad}** iyo **Qod.51^{aad} (4)** ee Xeer Hoosaadka Golaha Aqalka Sare.

MARKUU ARKAY:

Qod.61^{aad} (1) iyo (3) ee Dastuurka KMG ah.

MARKUU TIXGELIYAY:

Sida wanaagsan ee uu Guddiga Khayraadka Qaranka, Kaabayaasha Dhaqaalaha iyo Gaadiidka ee Golaha Aqalka Sare ee BFS uga soo shaqeeyay **Hindise-sharciyeedka Xakameynta Kiimikooyinka Beeraha Soomaaliyeed**.

MARKUU GAROWSADAY:

In danta guud ee Dalku ku jirto meel marinta **Hindise-sharciyeedka Xakameynta Kiimikooyinka Beeraha Soomaaliyeed**.

ISAGA OO KU KULANSAN:

Kalfadhiga 5^{aad}, Kulankiisa 20^{aad}, oo ay soo xaadireen **30 Senator** (Soddon Senator).

WUXUU GUDDOONSADAY QODOBADA HOOS KU XUSAN:

Qod.1^{aad}

ANSIXINTA HINDISE-SHARCIYEEDKA


Golaha Aqalka Sare wuxuu cod buuxa ku ansixiyay **Hindise-sharciyeedka Xakameynta Kiimikooyinka Beeraha Soomaaliyeed** isaga oo wax-ka-beddel ku sameeyay.

Qod.2^{aad}

GUDBINTA QARAARKA GOLAHA AQALKA SARE

Qaraarka Golaha Aqalka Sare waxaa loo gudbinayaa Golaha Shacabka ee Baarlamaanka Federaalka Soomaaliya.

Handwritten signature of Sen. Cabdi Xaashi Cabdullaahi.



Sen. Cabdi Xaashi Cabdullaahi
Guddoomiyaha Golaha Aqalka Sare ee
Baarlamaanka Federaalka Soomaaliya



Federal Republic of Somalia
Federal Parliament
The Upper House
Committee on National Resources, infrastructure and Transportation

Ref: GKHQKDH&G/B-11/22/2024

Tr: 19/11/2024

Ku: Guddoonka Golaha Aqalka Sare

Ku: Xubnaha Golaha Aqalka Sare

Ujeedo: Soo jeedinta Warbixinta Akhrinta 3^{aad} ee Hindise-sharciyeedka Hay'adda Sharciyeeynta Adeegyada iyo Baaritaanka Beeraha Soomaaliyeed (SARIS) iyo Hindise sharciyeedka Xakameynta Kiimikooyinka Beeraha Soomaaliyeed.

Mudane Guddoomiye,

Senetorrada sharafta badan,

Guddiga Khayraadka Qaranka, Kaabayaasha Dhaqaalaha iyo Gaadiidka ee Golaha Aqalka Sare ee BFS wuxuu idinla wadaagayaa warbixin ku saabsan labada Hindise-sharciyeed ee **Hindise-sharciyeedka Hay'adda Sharciyeeynta Adeegyada iyo Baaritaanka Beeraha Soomaaliyeed (SARIS) iyo Hindise sharciyeedka Xakameynta Kiimikooyinka Beeraha Soomaaliyeed**, iyo marxaladihii ay soo mareen.

Guddigu wuxuu akhrintii 2aad ee hindise-sharciyeedyadaan ka hor akhriyay Golaha Aqalka Sare **18^{kii} Nofeembar, 2024**, iyada oo senetorrada sharafta leh ay soojeediyeen talooyin wax ku ool ahaa.

Haddaba, Guddiga oo tixgelinayaa talooyinka iyo soo-jeedinnada Senetorrada sharafta leh ayaa wax-ka-beddel ku sameeyay laba qodob kuwaas oo kala ah.

- 1- Golaha Hagista ee Hay'adda SARIS oo ka kooban 11 Xubnood, waxaa lagu daray **"kuwaas oo 30% ay haween yihiin**. Sidoo kale in la kordhiyo tirada Xubnaha iskaashatooyinka ee ka mid noqonayo golaha hagista ee Hay'adda SARIS.


- 2- Qodobka 15aad oo ahaa “Dembiyada ka dhalan kara Sharciga Kiimikooyinka Beeraha”, faqradihiisa 6aad iyo 7 aad oo hadda noqday Qodobka 16 aad, Faqradihiisa 1 aad iyo 2aad, waxaa la qaatay taladii ahayd in ganaaxa iyo xariga laga dhigo in “Garsoore ikhtisaas ama awood u leh uu go’aan kasoo saaro”.

Ugu dambeyn Guddigu wuxuu Senetorrada sharafta leh ka codsanayaa in aad labadaan Hindise-sharciyeed ee kala ah, **Hindise-sharciyeedka Hay’adda Sharciyeynta Adeegyada iyo Baaritaanka Beeraha Soomaaliyeed (SARIS)** iyo **Hindise sharciyeedka Xakameynta Kiimikooyinka Beeraha Soomaaliyeed** ku aqbashaan, kuna ansixisaan sida uu Guddigu uga soo shaqeeyay.

Mahadsanidiin.

Xubnaha Guddiga

1. Sen. Seynab Ismaciil Maxamed
2. Sen. Xasan Idoow Muxumad (Kobac)
3. Sen. Samsam Daahir Maxamuud
4. Sen. Axmed Maxamed Saciid
5. Sen. Cabdirisaaq Maxamed Cusmaan
6. Sen. Abwaan Axmed Ibraahim Maxamed.



Sen. Seynab Ismaaciil Maxamed

**Guddoomiyaha Guddiga Khayraadka Qaranka,
Kaabayaasha Dhaqaalaha iyo Gaadiidka
ee Golaha Aqalka Sare ee BFS**



JAMHUURIYADDA FEDERAALKA SOOMAALIYA

WASAARADDA BEERAHA IYO WARAABKA

SHARCIGA XAKAMEYNTA KIIMIKOOYINKA BEERAHA SOOMAALIYEED

NOFEEMBAR 2024

TUSMO

CUTUBKA 1AAD.....	1
QODOBADDA GUUD.....	1
Qodobka 1aad	1
Magaca Sharciga	1
Qodobka 2aad	1
Baaxadda Sharciga	1
Qodobka 3aad	1
Eray bixin.....	1
Qodobka 4aad	3
Ujeedadooyinka Sharcigan	3
CUTUBKA 2AAD	4
MAAMULKA IYO HOWLAHA KIIMIKOOYINKA.....	4
Qodobka 5aad	4
Maamulka Xakameynta Kiimikooyinka	4
Qodobka 6aad	5
Codsiga Diiwaangelinta Kiimikooyinka	5
Qodobka 7aad	6
Soo dejinta, Warshadaynta, Dhoofinta iyo Iibinta Kiimikooyinka Beeraha	6
CUTUBKA 3AAD:	7
BAARAYAASHA IYO KORMEERAYAASHA.....	7
Qodobka 8aad	7
Magacaabista Baarayaasha iyo Falanqeyayaasha	7
Qodobka 9aad	7
Awoodaha Baaraha.....	7
Qodobka 10aad.....	8
Qaadashada Aqoonsiga shaqaalaha.....	8
Qodobka 11aad	9
Baarista (inspection) iyo soo Qaadista Muunadaha	9
Qodobka 12aad.....	10
Falanqaynta Muunadaha ku Saleysan Codsii	10



Qodobka 13aad.....	10
Shahaadooyinka falanqaynta (Analyst)	10
Qodobka 14aad.....	10
Ilaalinta Deegaanka.....	10
CUTUBKA 4AAD	11
DAMBIYADA IYO CIQAABAHA.....	11
Qodobka 15aad.....	11
Dambiyada ka dhalan kara Sharcigan.....	11
Qodobka 16aad.....	12
Ciqaabaha Dambiyada ku xusan Sharcigan	12
Qodobka 17aad.....	12
Caddeymo	12
Qodobka 18aad.....	12
Mas'uuliyadda Dambiga ee Maareeyayaasha ,Wakiillada iyo Shaqaalaha	12
Qodobka 19aad.....	13
Amarro Dhameystira Xukunka	13
CUTUBKA 5AAD	13
QODOBO KALE OO ISKU DHAFAN.....	13
Qodobka 20aad	13
Dhiirigelinta wax soo sarka Gudaha	13
Qodobka 21aad.....	13
Xeer Nidaamiyayaal	13
Qodobka 22aad	13
Dib-u-eegis	13
Qodobka 23aad	14
Baabi'in.....	14
Qodobka 24aad	14
Dhaqan-galka Sharciga	14



CUTUBKA 1AAD QODOBADDA GUUD

Qodobka 1aad Magaca Sharciga

Sharcigan waxaa lagu Magacaabaa Sharciga Xakameynta Kiimikooyinka Beeraha Soomaaliyeed.

Qodobka 2aad Baaxadda Sharciga

Si waafaqsan Qodobada 25, 27, 45,52 iyo 126 ee Dastuurka kumeel-gaarka ee Jamhuuriyadda Federaalka Soomaaliya Sharcigan waxaa looga dhaqmi doonaa Jamhuuriyadda Federaalka Soomaaliya.

Qodobka 3aad Eray bixin

Ayada oo la eegayo ujeedada sharcigan, haddii aan si kale loo dhigin, ereyada soo socda waxaa loo qaadanayaa mid walba qeexidda ku hor qoran:

1. **“Kiimikooyinka Beeraha”** Waxaa loola jeedaa bacramiyeyaasha, Xakameeyeyaasha kobaca, fermoonis (**Pheromones**), iyo kiimikooyinka badbaadinta dhirta ay ka mid yihiin, fangi- dileyaasha, Dullin-dilayaasha, nema-dilayaasha (**Nematicides**), geed-hoosaad-dilayaasha, caaro- dilayaasha, bakteeriya-dilayaasha, jiir-dilayaasha, dixri-dilayaasha, shimbir-dilayaasha, Dullin-dilayaasha, kiimikooyinka noolaha saameyn ku lahayn, nooleyaha bacramiye ama kiimiko kasta oo kale oo loo isticmaalo kor u qaadista, ilaalinta caafimaadka dhirta iyo wax soo saarka dhirta iyo waxyaabaha ka dhasha;
2. **“Beeraha”** waa loola jeeda dhul cayiman oo loo asteeyay ama loogu tala-galay ku dhaqanka ku saabsan tacabashada dalagyada si loogu adeegsado quud ama ganacsi;
3. **“Baare”** waxaa loola jeeda qof lagu magacaabey si waafaqsan sharcigan si uu u noqdo baare ujeedooyinka sharcigan;
4. **“Falanqeeye-Analyst ”** waxaa loola jeeda qof lagu magacaabey si waafaqsan sharcigan si uu u noqdo falanqeeye ujeedooyinka sharcigan;



5. **“Dhoofiye”** waa qof lagu diiwaan geliyey sharcigan si uu u dhoofiyo Kiimikooyinka Beerahaama maadooyinkooda;
6. **“Bacrimiye”** waa walxo kasta ama isku-qas sheeyaal loogu talo-galay ama loo bixiyey hagaajinta ama joogteynta koritaanka dhirta ama wax-soo-saarka, waxaana ku jira digada, qashinka, dambaska, Jeesso ama wasakhda marka lagu iibiyo xaaladeeda asal iyo magac iskumid, aan ka ahayn nuurad.
7. **“Sun bixiye”** waa waxii Kiimiko Beereed ah ee ku muujinaya sunnimo weji uumi;
8. **“Soo dejiye”** waa qof lagu diiwaan geliyey sharcigan inuu soo dejiyo Kiimikooyinka Beeraha ama Maadooyinkooda.
9. **“Summad”** waa wax kasta oo la qoray, la daabacay ama qaab garaaf ama ku dhegan waxii Kiimiko Beereed ama weelka lagu keenay Kiimikooyinka Beeraha iyo weelka dibadda ama xirmooyin tafaariiq ee Kiimikooyinka Beeraha;
10. **“Soo saare”** Waa qof lagu diiwaan geliyey sharcigan si uu u soosaaro Kiimikooyinka Beeraha ama maadooyinka loo isticmaalo Kiimikooyinka Beeraha;
11. **“Wasiir”** waa Wasiirka beeraha iyo waraabka xukuumadda Federaalka Soomaaliya;
12. **“Wasaarad”** Waxaa loola jeedaa Wasiirka Wasaaradda Beeraha iyo Waraabka ee JFS;
13. **“Dulin”** Waxa loola jeedaa noole kasta (dhir,xayawaan,cayayaan,jeermis,IWM) ee jooga goob iyo waqti aan loo baahneyn waxyeelana u geysan kara si toosa ama dadban dhir,dalag,xoolo iyo dad.
14. **“Adeegsade dulindile”** waa qof haysta shuruudaha adeegsiga sunta dulindilaha sidaasna uga diiwaan gashan sharcigan;
15. **“Dulindile”** waa kiimiko, oo qaabka astaamaheeda summadeed loogu adeegsado in dulinka looga laayo dalagga beeraha;
16. **“Dhismayaasha”** waa dhismooyin sida lagu qeexay xeerarka lagu sameeyey sharcigan;
17. **“Qalabka Ilaalinta Shakhsiyeed”** waa dhammaan dharka loo baahanyahay inuu ilaaliyo adeegsadaha ama qofka ka shaqeeya Kiimikooyinka Beeraha sida lagu cadeeyey sharcigan;
18. **“Ganacsade Diiwaan gashan”** waa qof Ganacsade ah oo sharcigan uga diiwaan gashan inuu iibiyo Kiimikooyinka Beeraha;



19. **“Khabiiir sunta uumiga oo diiwaan gashan”** waa qof haysta qoraal inuu u qalmo ka shaqeynta sunta uumiga bixisa una diiwaan gashan sida ku shaqeeye suntaas ama ka hawlgale sharcigan;
20. **“Kiimiko Beereed la Xadiday”** waxa loola jeedaa kiimiko beereed u keeni karta halis Caafimaad Bulshada, Beeralayda, Xoolaha, Duurjoogta, Shinnida, Deegaanka iyo dalagyada.
21. **“Badqab”** waxaa loola jeedaa badqabka aadanaha, xoolaha, duurjoogta, shimbiraha, kalluunka iyo noolayaasha kale iyo dhul, biyo, hawo iyo deegaan guud;
22. **“SARIS”** Waa Hay’adda Sharciiyeynta Adeegyada & Baaritaanka Beeraha Soomaaliyeed “Somali Agricultural Regulatory and Inspection Services (SARIS)”.
23. **“Iibin”** waxaa loola jeedaa bixinta, xayeysiinta, xafididda, shaacinta, gudbinta, gaarsiinta, geynta ama kala-beddelashada.

Qodobka 4aad Ujeedadooyinka Sharcigan

Ujeedooyinka sharcigaa waa:

1. In la xakameeyo soo dejinta, dhoofinta, iibka, wax soo saarka, Badqabka iyo sidoo kale ilaalinta caafimaadka bulshada, dhowrida iyo xanaaneynta deegaan marka laga hadlayo Kiimikooyinka Beeraha.
2. In la helo ama la abuuro suuq iyo jawi xor ah ayna u siman yihiin dhamman kuwa soo dejiya, soo saara iyo kuwa qaybiya kiimikooyinka beeraha.
3. In la xaqiijiyo saameynta ama wixii xakameynta kiimikooyinka beeraha ay u/ku leeyihiin dulinnadda iyo dalagyada loogu talagaley.
4. In la xakameeyo in kiimikooyinka beeraha ay ku galaan gacan qaldan.



CUTUBKA 2AAD
MAAMULKA IYO HOWLAHA KIIMIKOORYINKA
Qodobka 5aad
Maamulka Xakameynta Kiimikooryinka

1. Hay'adda SARIS ayaa leh masuuliyadda inay kormeerto, maamusho ama hirgeliso ku dhaqanka sharcigan.
Hawlaha Xakameynta Kiimikooryinka waxa ka mid ah:
 - b. Baaritaanka iyo la socodka arrimaha la xiriira Warshadda Kiimikooryinka Beeraha oo ay tahay inay SARIS kormeerto.
 - t. Hubinta in kiimikooryinka Beeraha sida ugu habboon loo diiwaan geliyey iyo in Kiimikooryinka Beeraha noocaas ah loo adeegsado hab raacsan sumaddooda ku saleysantahay xeerarka lagu sameeyey qodobkan.
 - j. Dejinta habka lagu kormeero tayada, soo gelinta iyo qaybinta Kiimikooryinka Beeraha Soomaaliya.
 - x. Tixgelinta codsiyada diiwaan gelinta ee soo-saareyaasha Kiimikooryinka Beeraha, codsabayaasha ganacsi shatiyeysan ee Kiimikooryinka Beeraha iyo khubarada sunta uumiga ee diiwaan gashan iyo bixinta shatiyada
 - kh. Hakinta, burinta, ka-laabashada shahaado diiwaan gelin, shati lagu bixiyey sharcigan ama Xeer nidaamidaamiyayaasha hay'adda.
 - d. Kala talinta Wasiirka arrimaha ku saabsan siyaasadaha kiimikooryinka beeraha.
 - r. Kala shaqaynta hay'adaha kale dhaqan gelinta sharcigan; iyo.
 - s. Habeynta Warshadda kiimikooryinka Beeraha ee Soomaaliya ay ka mid tahay soo saarka, baakadeynta, soo dejinta iyo suuqgeynta kiimikooryinka beeraha.
 - sh. Habeynta soo dejinta alaabta aan la warshadayn ee loo isticimaalo samaynta kiimikooryinka beeraha.
- dh. Sare u qaadida soo-saaridda kiimikooryinka beeraha.
- c. Kala talinta dowladda Federaalka iyo dowlad Goboleedyada dalka
 - i. Soo iibsiga, soo dejinta iyo qaybinta hufan ee waqtiga ku habboon ee kiimikooryinka Beeraha.
 - ii. Samaynta xarumo bixinta tafaariiqda kiimikooryinka Beeraha ee



degmooyinka.

- iii. Dejinta siyaasadaha la xiriira soo-saaridda iyo qeybinta kiimikooyinka Beeraha.
- g. Kormeeridda iyo tijaabinta kiimikooyinka Beeraha si loo hubiyo tayada iyo badqabka.
- f. Bixinta shatiyada soo-saarayaasha, qaybiyayaasha iyo kuwa iibiya tafaariiqda kiimikooyinka Beeraha.
- q. Kor u qaadida, iyadoo lala kaashanayo daneeyayaasha warshadaha beeraha, cilmi baarista ku saabsan kiimikooyinka Beeraha.
- k. Xaqiijinta in kiimikooyinka Beeraha ee la soo dhoofiyey ama la soo saaray ama lagu qaybiyey in ay waafaqaan heerarka tayada iyo Badqabka sida sharcigan uu farayo; iyo.
- l. Daraasayn iyo u-kurgelida arrimaha la xiriira warshadaha kiimikooyinka Beeraha oo ay Wasaaraddu ka codsato SARIS inay la socoto, oo ay waqti ka waqti u soo gudbiso arrimahaas oo ay ku taliso tallaabooyinka ay u aragto inay lama huraan yihiin ama laga talo bixin karo danaha dadweynaha ee maareynta iyo horumarinta warshadahaas.

Qodobka 6aad

Codsiga Diiwaangelinta Kiimikooyinka

1. Codsiga diiwaan-gelinta ee Kiimikooyinka Beeraha waxaa loo dirayaa Hay'adda SARIS si waafaqsan qodobka iyadoo la isticmaalayo foom cayiman oo ay la socon doonaan waxyaabaha soo socda:
 - b. Khidmad horay loo qoray; iyo
 - t. Xogta, Muunado iyo Aalad kasta oo ay u baahan karto SARIS
2. Marka ay hesho codsi isdiiwaan-gelin, SARIS waxay baari doontaa codsiga si ay u go'aamiso in Kiimikada beeraha ee la codsanayo ay tahay mid wax ku ool ah oo ku habboon in lagu isticmaalo Soomaaliya ama ay waafaqsan tahay xeer nidaamiyayaasha.
3. SARIS waxa ay sameyn kartaa, kadib markii ay baarto codsiga:
 - b. Inay ogolaato diiwaangelinta Kiimikooyinka Beeraha;
 - t. Inay diido diiwaan-gelinta Kiimikooyinka Beeraha;
 - j. Inay dib u dhigto go'aan ka gaarista haddii loo baahdo macluumaad dheeri



ah; ama

- x. Haddii Kiimikada Beeraha ay ka diiwaan gashant ahay waddan kale, ay diiwaan geliso Kiimikooyinka Beeraha iyada oo la marinayo tijaabooyin dheeri ah, ha noqoto gudaha Soomaaliya ama sheybaar shisheeye oo la aqoonsan yahay, si loo hubiyo wax ku oolnimadeeda iyo ku habboonaanta Soomaaliya.
- 4. Haddii ay SARIS diiwaan-geliso Kiimikooyinka Beeraha, waxay siinaysaa codsada:
- b. Shahaado iyada oo markaasina ku dhejineysa, shahaadada la siiyay shuruudaha la xiriira soo dejinta, dhoofinta, warshadaynta, astaynta, xayeysiinta, qaybinta, iibka iyo adeegsiga Kiimikooyinka Beeraha si loo hubiyo wax ku oolnimada iyo ku habboonaanta Soomaaliya.
- t. Kala saarida Kiimikooyinka Beeraha iyagoo ah Kiimikooyinka xadaysan ee Beeraha si loogu maareeyo daryeel gaar ah una keenin wasakheynta deegaanka, ama waxyeello ugu geysan aadanaha, xayawaanka ama nolosha dhirta; ama
- j. In adeegsiga Kiimikooyinka Beeraha ay u baahantahay in lagu adeegsado iyada oo uu jiro kormeerka qof ay u xilsaartey SARIS.

Qodobka 7aad

Soo dejinta, Warshadaynta, Dhoofinta iyo Iibinta Kiimikooyinka Beeraha

1. Qofna ma dhoofin karo, sooma gelin karo, ma iibin karo, kumana warshadayn karo Gudaha Soomaaliya walxaha Kiimikooyinka Beeraha kuwaas oo aan lagu diiwan gelinin, baakadaynin si waafaqsan xeer nidaamiyayaasha lagu sameynayo sharcigan.
2. Qofna Soomaaliya dibadda ugama dhoofin karo ama dib uguma soo-dhoofin karo Kiimikooyinka Beeraha ilaa uu qofka ama kiimikooyinka beeraha ay buuxiyaan shuruudaha lagu tilmaamay Sharcigan.
3. Qofna kuma iibin karo Soomaaliya dhexdeeda kiimikooyinka Beeraha ilaa uu qofku yahay/tahay iibiye leh shati ku diiwaangashan si waafaqsan sharcigan.



CUTUBKA 3AAD
BAARAYAASHA IYO KORMEERAYAASHA

Qodobka 8aad
Magacaabista Baarayaasha iyo Falanqeeyayaasha

1. Maareeyaha hay'adda SARIS, ayaa magacaabaya Falanqeeyayaasha iyo baarayaasha ku haboon oo u qalma fulinta ujeedada sharcigan; iyada oo shuruudu tahay in ruqsadda la gala noqon karo haddii ay ku kacaan kiisas anshax xumo iyo wax kasta oo sharciga ka hor imanaya.
2. Qofka lagu magacaabay si waafaqsan faqrada (1aad), kuma lug yeelan karo wax hawl ah oo la xiriirta soo dejinta, dhoofinta, soo-saaridda, ka-shaqaynta, iibinta ama qaybinta Kiimikooyinka Beeraha.

Qodobka 9aad
Awoodaha Baaraha

1. Baaraha oo ujeedkiisu yahay fulinta howlihiisa/howlaheeda sida ku xusan sharcigan awoodihiisu waa;
 - b. Inuu galo ama baari karo meel kasta, dhismooyin, gaari ama doon, ujeedkeedu yahay in uu fuliyo howl kasta oo lagu tilmaamay sharcigan iyo xeer nidaamiyayaasha lagu sameeyey sharcigan iyadoo uu raacayo tilmaamaha hoos ku xusan.
 - i. In baaruhu aaminsan yahay in Kiimikooyinka Beeraha oo uu sharcigan khuseeyo lagu keydiyey, iibiyey ama loo adeegsaday;
 - ii. In baaruhu uu aaminsan yahay in ay jiraan walax, qof, xayawaan, ama dalag oo ay waxyeelleysay Kiimikooyinka beeraha.
 - iii. In goobta loo adeegsan karo Warshadaynta kiimikooyinka Beeraha.
 - iv. In baaruhu si maangal ah uga shakisan yahay in loo adeegsan karo ama laga yaabo in loo adeegsado fulinta fal-dambiyeed sida uu dhigayo dharcigan ama Xeer nidaamiye kasta oo lagu sameeyo sharcigan.
 - t. Inuu baaro walax kasta ee kiimikooyin Beeraha ee laga helo meel kasta sida sida; Dhismooyin, Gaari, Markab ama furidda weelka laga helo Dhismooyinka ee la rumeysanyahay inay ku jirto Kiimikooyinka beeraha kana qaado Muunado.
 - j. Baaruhu inuu waydiiyo qofka soo saaridda dukumantiyada, buugaagta



iyo wax kasta oo la xiriira kiimikooyinka beeraha si uu u baaro ama nuqul uga qaato.

2. Mulkiilaha ama qof kasta oo Mas'uul ka ah goob kasta, dhismooyinka lagu xusay faqrada (1aad) ee qodobkan iyo qof kasta oo laga helo dhismaha ama goobta waa inuu siiyaa baaraha dhammaan cawimaadda maangalka ah ee u suurtagalinaya baarayaasha inay fuliyaan waajibaadkooda shaqo sida ku xusan sharcigan ama xeer nidaamiyayaasha uu sameynayo sharcigani.
3. Qof walba oo u diida gelitaanka baaraha ku shaqeynaya qodobkan ama ka horjoogsada baaritaanka ama isagoo si cudurdaar la'aan ah ugu guul darreysta inuu soo saaro Kiimikooyinka Beeraha, qalab ama dukumanti si loo baaro, wuxuu galayaa dembi.
4. Qofna xaq uma leh in la siiyo lacag ama magdhaw qaddarka kiimikooyinka beeraha ee muunad ahaan loo qaaday sida ku xusan qodobkan.

Qodobka 10aad

Qaadashada Aqoonsiga Shaqaalaha

1. Baaraha waxaa la siinayaa aqoonsi leh sawirka iyo darajada baaraha iyo sumadda SARIS marka loo magacaabo baare si uu howshiisa uga guto islamarkaana sitaa marka uu galayo goobaha, Dhismooyinka, Gaari ama markab sida ku xusan faqrada 1aad ee qodobka 9aad ee sharcigan.
2. Kaarka ama Aqoonsiga waxaa in la tusaa dadka ay qusayso marka Baarayaashu ay adeegsanayaan awoodooda iyadoo la raacayo tilmaamaha faqradda 1aad ee qodobkan 10aad, ama markii uu ka codsado qofka ay khusayso.
3. Qofka la macaamilaya baaraha waa inuu weydiiyaa baaraha inuu tuso aqoonsigiisa oo ay ku caddaahay macagiisa iyo darajadiisa.
4. Mulkiilaha ama qofkasta oo mas'uulka ka ah goob kasta, Dhismooyin lagu xusay faqrada (1aad) ee qodobkan iyo qof kasta oo laga helo dhismaha ama goobta waa inuu siiyaa baaraha dhammaan caawimaadda maangalka ah ee u suurtagelinaya Baarayaasha inay ku fuliyaan waajibaadkooda shaqo sida ku xusan Sharciga ama xeer nidaadmiye kasta oo kale ee lagu sameeyo sharcigan.



Qodobka 11aad
Baarista (inspection) iyo soo Qaadista Muunadaha

1. Baaraha wuxuu waqti kasta oo macquul ah iyo xilliga wax-soo-saarka, haddii uu u baahdo—
 - b. Galayaa oo baarayaa dhismaha walba, goob ama gaari oo uu u hayo sabab macquul ah oo uu ku aamino inay kujiraan wax Kiimiko Beeraha ama diiwaanno la xiriira soo dejinta, warshadayn ama iibka Kiimikooyinka Beeraha.
 - t. Haddii baaruhu u arko inay lagama maarmaan tahay la wareegi karaa ama dibadda u soo saari karaa wixii Kiimikooyinka Beeraha ah ama buugaagta, diiwaanno ama dukumiintiyo ee kujira Dhismooyinkaas, goobtaas ama gaarigaas kuwaasi oo ku saabsan soo saarista, soo dejinta, isku-qaska, isku-lifaaqa ama iibinta Kiimikooyinka Beeraha oo uu uhayo sabab macquul ah uu ku aamino inay keeneyso caddayn ku saabsan wax kasta oo ka hor imanaya mid ka mid ah shuruudaha sharcigan ama xeer nidaamiye kasta oo lagu sameeyay sharcigan;
 - j. Qaadaa muunadaha noocaas ah sida loogu talagalay wax kasta oo Kiimikooyin Beeraha ah maadaama uu u arki karo in lagama maarmaan u tahay gaarista ujeedka tijaabo ama baaritaan una yeeran karaan qofka kujira dhismaha ay kujirto Kiimikooyinka Beeraha, si uu u siiyo caawimaad macquul ah u baahan karo fulinta hawsha.
2. Baaruhu wuxuu qaadayaa tillaabooyinka sida ugu macquulsan loogu dhaqmi karo inuu ogolaado in milkiilaha ama qofka ku jira dhismaha Kiimikooyinka Beeraha fursad ay goobjoog ku ahaadaan marka wax baaritaan ah laga sameeynayo dhismayaasha.
3. Haddii la rabo in muunad loo gudbiyo baaritaan (analysis), baaraha gudbinaya muunadda waa inuu kahor ama sida ugu dhaqsaha badan kadib markii uu soo gudbiyo ogeysiyo milkiilaha Kiimikooyinka Beeraha, inuu doonayo inuu muunadda baaritaan urabo.
4. Haddii uu baaruhu soo qaado muunada si loo falanqeeyo wuxuu u kala qaybin doonaa Saddex (3) qaybood wuxuuna sameynayaa in qayb kasta la calaamadeeyo, la shaanbadeeyo ama la xiro, wuxuuna u dirayaa labo (2) qayb oo ka mid ah muunadda falanqayn uuna weheliyo qoraal saxiixan oo ah in muunadda loo qaaday qaabkii loogu tala galay, qaybta saddexaadna waa inuu



u geeyo milkiilaha ama iibiyaha.

5. Marka uu u qaadayo muunadda si loo soo falanqeeyo sida ku xusan qodobkan, baaruhu wuxuu raacayaa habraaca loo dejiyey.
6. Qofna xaq uma yeelan doono in lacag lasiiyo ama uu magdhow u dalbado qaddarka Kiimikooyinka Beeraha ee muunada ahaan loo qaatay sida ku xusan qaybtaan sharciga.

Qodobka 12aad

Falanqaynta Muunadaha ku Saleysan Cods

1. Mar kasta oo iibsadaha kiimikooyinka beeraha uu qoraal kaga codsado hay'adda islamarkaana iibsaduhu uu bixiyo kharashka muunadda oo ay wehliso khidmadda soo qaadidda muunadda sida uu qabo sharcigan,
2. Baare ka socda hay'adda ayaa soo iibinaya muunadda Kiimikada Beeraha una gudbinaya falanqeeyaha (analyst) ka dibna wuxuu u gudbinayaa iibsadaha shahaadada falanqaynta.

Qodobka 13aad

Shahaadooyinka falanqaynta (Analyst)

1. Shahaado kasta oo uu sameeyey falanqeeye si waafaqsan sharcigan waxa ay noqoneysaa mid kama dambays ah.
2. Haddii uu jiro hab loo dejiyey falanqeynta walxaha kiimikada Beeraha, falanqeeyuhu waa inuu caddeyaa inuu raacay habkii loo dejiyey.

Qodobka 14aad

Ilaalinta Deegaanka

1. Qof kasta oo adeegsanaya Kiimikooyinka Beeraha waxaa waajib ku ah:
 - b. Yareeynta burburka deegaanka;
 - t. Inuusan qubin Kiimikooyinka Beeraha;




- j. Ka-hortagga wasakheynta iyo ku qubidda dhulka, hawada iyo biyaha;
- x. Ka hortagga in kiimikooyinka Beeraha ay galaan deegaanka iyaga oo marayo qulqulka biyaha.
- kh. Inuu u nadiifiyo kiiimikooyinka beeraha si deg deg ah ayadoo la adeegsanayo habraacyo loogu tala-galay;

CUTUBKA 4AAD DAMBIYADA IYO CIQAABAHA

Qodobka 15aad Dambiyada ka dhalan kara Sharcigan

1. Qof kasta waxa uu noqon karaa dambiile haddii uu:
 - b. Si ula kac ah u sameeyo qoraal been ah, oraah ku jirta warbixin, diiwaan, dukuminti lagu tilmaamay sharcigan, ama amar ay soo saartay Hay'adda SARIS, iyada oo la raacayo sharcigan iyo shuruucda kale ee dalka.
 - t. Si ula kac ah u beeniya ama u baabi'iya warbixin ama dukumintiyo kale ee lagu tilmaamay xeer nidaamiyayaal ay soo saartey Hay'adda SARIS.
 - j. Si ficil ah ugu xadgudba qodobada sharcigan, khatar geliya nolosha iyo jiritaanka qof ahaaneed ama khatar geliya hanti ama deegaanka.
2. Qof kasta oo xannibaad ku sameeya baare (inspector) ama falanqeeye (Analyst) wuxu gelaya dambi haddii:
 - b. Cudurdaar la'aan uu carqaladeeyo, dhibaateeyo ama ka horjoogsado baare ama falanqeeye isaga oo kujira fulinta awoodahiisa sida ku xusan Sharcigaan;
 - t. Si ula-kac ah ama taxaddar la'aan ah u sameeya bayaan ama soo-saaro dukumiinti been ah kaasoo marin-habaabin ku ah baaraha ama falanqeeyaha ku hawlan gudashada waajibaadkiisa si waafaqsan Sharcigan.
3. Dembiyada ay gasho shirkad.
 - b. Haddii dambi ay gashay shirkad leh shakhsiyad qaanuuneed la caddeeyo in lagu galay ogolaanshaha ama qarinta, ama loo aanayn karo diidmo ka timid Agaasime, Maareeye, Xoghaye ama Sarkaal kale oo ka tirsan Shirkadda ama qof kasta oo ku shaqeynayay jagadaas, shirkadda ayaa gashey dembigaas waxana lagu oogayaa dacwad ciqaabeed si waafaqsan sharcigan.



4. Dambiyada la xiriira wasakhaynta deegaanka:
5. Qof kasta oo deegaanka ku wasakheeya kiimikooyinka beeraha wuxuu galayaa fal-dambiyeed.

Qodobka 16aad

Ciqaabaha Dambiyada ku xusan Sharcigan

Dambi kasta ee ka dhasha jabinta sharcigan waxaa lagu dhaqayaa Xeerka Ciqaabta Soomaaliyeed iyo Xeerarka kale ee dalka.

Qodobka 17aad

Caddeymo

1. Dacwad kasta oo lagu qeexey Sharcigan waxaa caddeyn u noqonaya:
 - b. Muunad Kiimikooyin Beereed oo uu soo qaaday baare, kana kooban walxo isku mid ah isla markaana lehna sifo iyo tayo isku mid ah, marka loo eego walxihii laga soo dhex qaaday;
 - t. Shahaado falanqeyn oo uu saxiixay falanqeeye.

Qodobka 18aad

Mas'uuliyadda Dambiga ee Maareeyayaasha, Wakiillada iyo Shaqaalaha

1. Mar kasta oo Maamule, Wakiil ama Shaqaale soo-saare, soo-dejiye ama ganacsade diiwaan gashan ee Kiimikooyinka Beeraha uu sameeyo ama uu ka tago sameynta ficil kasta oo dhib keena wuxuu ku noqonaya dambi soo saaraha, soo-dejiyaha ama milkiilaha wuxuuna ku muteysanayaa ciqaab sida xusan sharcigan ama shuruucda kale ee dalka.
2. Markasta oo soo-saare, soo-dejiye, mulkiile, ama ganacsade diiwaan gashan ee Kiimikooyinka Beeraha uu sameeyo ama uu ka baaqsado hawl weliba oo noqon karta dembi wuxuu ku muteysanayaa ciqaab sida ku xusan sharcigaan ama shuruucda kale ee dalka.



Qodobka 19aad
Amarro Dhameystira Xukunka

1. Maxkamaddu marka ay xukumeysa qof kasta oo dembi ku galey sharcigan ama xeer nidaamiyayaasha hoos yimaada, waxay qaadaysaa tallaabo kasta oo ay u aragto inuu ku haboon yahay, sida:
 - b. La wareegidda ama tuuridda/ka takhalusidda Kiimikooyinka Beeraha;
 - t. Bixinta qayb ka mid ama dhammaan kharashaadka iyo lacagaha kale ee ku baxa falanqeynta (Analysis) Kiimikooyinka Beeraha;
 - j. la wareegid hanti(lacag, dukumiintiyo, xafiisyo ama dhisme, baabuur, farshaxan, doonyo ama qalab) loo adeegsaday fulinta dembiga;

CUTUBKA 5AAD
QODOBO KALE OO ISKU DHAFAN

Qodobka 20aad
Dhiirigelinta wax soo sarka Gudaha

Wasiirka Maaaliyadda asagoo ka duulaya talo soo jeedinta Hay'adda SARIS wuxuu hirgelinayaa siyaasadaha cashuureed ee ku saabsan Kiimikooyinka beeraha ee laso dejiyo si loo dhiiragaliyo warshadaha gudaha.

Qodobka 21aad
Xeer Nidaamiyayaal

SARIS iyadoo la tashaneysa Wasaaradda, waxay soo saaraysaa xeer-nidaamiyayaasha kiimikooyinka beeraha si waafaqsan sharcigan.

Qodobka 22aad
Dib-u-eegis

Sharcigaan waxaa dib-u-eegis lagu sameyn karaa xilli kasta oo baahi lagama maarmaan ah ay timaado kadib markuu dhaqan-galo;



Qodobka 23aad

Baabi'in

Sharcigaan waxa uu baabi'inayaa laga billaabo marka uu dhaqan-galo Sharci lambar. 49 ee 17 July 1971 kuna saabsan sunta cayayaanka ama xeer kasta oo kale oo kahor imaanaya ama aan la socon karin sharcigan.

Qodobka 24aad

Dhaqan-galka Sharciga

Sharcigaan waxa uu dhaqan-gelayaa marka uu ansixiyo Baarlamaanka Jamhuuriyadda Federaalka Soomaaliya, uuna Saxiixo Madaxweynaha JFS, laguna soo saaro Faafinta Rasmiga ah ee Dawladda FS.

